

aux acteurs d'alors s'ils eussent esté Chrestiens? et si les Chrestiens eussent pu deposseder l'idolatrie, et chasser l'impudicité du Caueau (1) et du Cirque. Mais à quel propos m'en vay-je si loin pour conuaincre et refuter ce calomniateur, comme si Beze, ce grand zéléateur de la reformation n'auoit point theatrisé son *Abraham*, et Buchanan son *Jephté*, et Héboannus Hessus (2), avec autres semblables, n'eussent dressé en action theatrale plusieurs parties de la sainte Bible. Si c'est mal fait de représenter les choses saintes, ces Reformez qui l'ont fait, seront avec les Iesuites coupables. Ce que n'apperceuant pas cet estourdi escriuain n'est-il pas en danger d'estre appelé au Consistoire?

Mais il est temps que je finisse, et que je laisse couler les autres mengeries, drogeries, malices et calomnies comprises en son libelle diffamatoire. Ce qui a esté dit est assez pour vous faire recognoistre (Messieurs) sur quel gibbier se iettent ces oyseaux de proye. Vous aggreerés, s'il vous plait, que j'aye defendu la verité contre ses mensonges, et que j'aye fait fait cognoistre aux villes esloignées de la nostre qu'à tort et fausement les Iesuites ont esté calomniez en vn fait auquel ils se sont montrez autant zelateurs du bien public, qu'amateurs de vostre honneur et desireux de l'aduancement de vos enfans, et pour lequel ils meritoient deuant les hommes plustot vne reciproque bienueillance que les calomnies de cet escriuain de Geneue. Il est vray qu'ils tiennent à assez de recompense d'auoir eu en cecy le désir et bonne volonté de vous seruir : et vous seruans, de glorifier celuy pour lequel ils endureront volontiers en ce monde, appuyez sur la ferme esperance qu'ils ont, qu'aprez le trauail suyura le repos qui est promis aux gens de bien au séiour de l'Eternité. A Lyon ce 10 iour d'octobre 1607.

Votre seruiteur bien humble et très affectionné,                    ANDRÉ DE CAULE.

(1) *Caueau*, du latin *Cavea*, l'Amphithéâtre, lieu où se donnaient les combats de gladiateurs.

(2) *Heboannus Hessus*; lisez: Eobanus Hessus. Ce poète surnommé à tort, ou à raison, l'Homère de l'Allemagne, est né dans la Hesse, le 9 janvier 1488.